

Haasaa Walgahii WAO waame irratti godhame

Caamsaa 29. 2010

MPLS, MN

ABOn kan dhihaate

Akkam ooltan?

Hunda dura, qophees kana qindeessee akka irratti argamnee yaada fi ilaalcha keenya gumaachinu nu afreerusaaf WAO galateeffachuun fedha. Obboleeyyan waldicha geggeessanis haala gaddisiisaa fi yaadessaa amma QBO keessa jiru hubatanii qooda saanii gumaachuuf ka'uu saaniif isaanin galateeffadha. Haala amma QBO keessa jiru irratti gadda fi yaaddoo isaan qaban waan isaan wajjin hirmaannuuf har'a asitti argamne.

Akeekin walgahii kana waamaniif, akka afeerraa nuu ergame irraa hubanetti, Mooraa Qabsoo Bilisummaa Oromoo keessatti araari bu'ee, qabsa'onna Oromoo humna tokkome fi hogganaa itiiitaa jalatti sosso'ani , yaada tokkoon diina irratti xiyyeeffatanii bilisummaa sabin Oromoo hawwuun akka ga'an gargaaruuf.

Kan obboleeyyan kun qabsaa'ota Oromoo irraa gaafataa jiran, araaraa, tokkummaa qabsaa'otaa, hoogganaa ititaa, diina irratti xiyyeeffachuu fi bilisummaa saba keenyaati. Qabsoo keenya keessatti kun hundi gaaffii yeroo ti. Waliigaltee dhabuun waan jiruuf araari gaaffii yeroo ta'e. Fafaca'iinsi qabsaa'ota Oromoo waan jiruuf tokkummaan saanii gaaffii jala gale. Qabsichi hoogganaa ititaa waan dhabeef itituun hoogganaa hawwame. Hunda caalaa, sabin keenya gabrummaa jalatti dararamaa waan jiruuf bilisummaansaa gaaffii belbeltuu yeroo ta'e.

Hara'a mareen asitti goonu egaa rakkoo kana hundaaf furmaata akeekuu qaba jechuu dha.

Ha ta'u malee, hundee rakkoolee kanaa osoo hin beekin furmaata akeekuun hin danda'amu. Osoo danda'ameellee, furmaatin akkasii furmaata waaraa ta'uu hin danda'u. Kanaaf, mareen keenya har'aa hundee dhukkuba kanaa xiinxaluu irraa jalqabuu qaba. Xiinxalli akkasii ammo dhugaa irratti hundaa'uu barbaada. Kanaaf, hammamille yoo hadhaa'e, dhugaa nutti mul'atu wal dhageessisuun dirqama ta'a.

Akka nuti hubanutti, hundeen rakkoolee kanaa hedduu fi xaxamoo dha. Kaan saanii kan alaa ykn alagaa irraa nutti dhufan. Kaan saanii ammao rakkoo keessaati. Har'a, rakkoolee keessaaf hundee kan ta'an qabxii lamatti qaba qabuun barbaada,

1. Inni duraa, Qabsaa'ota Oromoo gidduutti akeekin qabsoo ifaa ta'e dhibuu dha. Kana irraan kan ka'e gaaffileen "Oromoon maal barbaadaa?" jedhu fi kan "Akeekin QBO ABOn geggeeffamuu maali inni?" jedhu deddeebi'anii ka'u.
2. Inni lammataa qabsaa'onna akeeka tokkof qabsoofnna jedhan adeemsa qabsoo keessatti rakkoo isaan giduutti dhalatu aadaan ilaa fi ilaameen hiikkachuu dhibuu dha. Kana irraan kan ka'ee, qabsaa'onna kaayyoo tokkoof qabsoofnna jedhan dhaaba siyaasaa addaddaa keessatti gurmaa'anii argamu.

Waliigalteen dhibuu, qabsaa'onni faffaca'uu, hooggana ititaa dhabuu keenya irratti qabxiileen lamaan kun qooda guddaa qabu. Kan dabre irraa waan barachuu fi fuula durattillee kan sadarkaa duraatti sirreeffachuu qabnu dhimmoota kana lamaan fi kanneen isaanitti rarra'an ta'anii argina.

Mirga ofii falmachuuf qabsoo feesisa. Qabsoon ammoo qabsaa'aa fedha. Qabsaan ammo akeeka qabsaa'uuf fedha. Injifannoon tokkummaan gurmaa'anii qabsaa'uu gaafata. Tokkummaan qabsaa'otaa ammo kan irratti hundaa'uu akeeka ykn kaayoo isaan bakkaan ga'uu fedhan irratti. Addamsa qabsoo keessatti ammo rakkoon addaddaa dhalachuun hin hafu. Yoo Aaddaa fi sirnna ittiin rakkoo hiikkatan hin qabaanne tokkummaa gaaga'a, Tokkummaan qabsaa'otaa yeroo laafu, qabsoo gaaga'a.

Kanaaf ragaa guddaan haala amma QBO keessa jiru caale hin jiru. Erga ABOn bara 2001 keessa, adda-addummaa ilaalcha siyaasaa irraan kan ka'e, bakka lamatti baqaqee booda qabsoon bilisummaa Oromoo yeroo dheeraaf yeelalaa dhufee sadarka gaddisiisaa fi yaaddessaa amma jiru irra ga'e.

Jeequmsi baqaqi kun mooraa QBO keessatti uume, mootummaa Wayyaanee caalaatti ija jabeesse. Wayyaaneen, yaaddoo tokko malee roorroo saba keenya irraan ga'u hammeessaa dhuffte. Lafa Oromoo, Oromoo irraa buqqiftee, abba fedhetti gurguruutti bobbaate. Osoo nuti tokkummaan qabsoofnee irree cimaa qabaannee jirannee warri Wayyaaneen itti gurguruu yaaltullee bituu sodaatu turan. Sabin irree cimaa hin qabne alagaa biratti kabaja hin qabu. Kanaaf, alagaan lafa saba keenyaa akka qircaa gargar hirachaa jira. Irree cimaa dhabuu keenyaaf sababin tokkummaa dhabuu keenya. Tokkummaa kan dhabneef akeeka qabsoo ititaa dhabuu fi aadaa rakkoo nagaan hiikkachuu dhabuu keenya irraa ti.

Lafa keenya qofa miti; irree cimaa dhabuun keenya nama keenyas gaaga'ama caalaaf saxile. Hidhaa fi dararamn Wayyaaneen irraan geessu yeroo kamuu caalaa hammaachaa dhufe. Kanneen baqatanii biyyoota ollaa jiranille daangaa dabtree uukkamsuun mana murtii mataa isheetti dhiheessitee du'a itti muruuf ija jabina kenneef. Osoo qabsaa'onni Oromoo irree cimaa qbanaatanii jraatanii mootummoonni ollaalle nama keenya qabani diinatti kennuu ni sodaatu turan. Maal goona ree? Nutoo irree cimaa horachuuf tokkummaan sossaa hin jirru! Sabin irree cimaa hin qabnemmo alagaa biratti kabaja hin qabuu!

Tokkummaan qabsaa'ota Oromoo isheef badiisa akka ta'e waan beektuuf qabsaa'ota Oromoo gargar eeguun hojii wayyaaneen itti boobbatee keessaa isa guddaa dha. Basaasota addaddummaa keenya xixiqqoo irratti xiyyeeffachuun caalaatti nu diigan hedduu nu keessa bobbaaftte. Ganduummaa, naannummaa fi amantiin gargar nu hirttee walitti nu bobbaasuuf maallaqa hedduu dhangalaaftte. Sobaan wal yakkuu fi wal shakkuun akka nu gidduutti dagaagu halkanii fi guyyaa hojjette. Kana irratti hamma tokko waan milkoofte fakkaata. Osoo tokkummaan qabsaa'ota Oromoo jabaa ta'ee jiraatee qabsoon keenya akkasi diinaa banaa hin ta'ure.

“Muka kufetti qottotu baayyata” akkuma jedhan, ayyaan-laallattoonni dhalootaan Oromoo ta'an faydaa mataasaanii addaddaan bitamuun diina kanaaf meeshaa ta'anii sabboontota Oromoo afanfaajjeessuu fi abdi kutachiisuu yaaluutti bobba'an. Ayyaan-laallattoonni biyya alaa jiraatan, dhaqanii lafa Oromoo Wayyaaneen ittiin deggersa horachuuf jecha hirttu fudhatanii, mana irratti ijaarrachuu jalqabani, achi as yeroo deebi'an sabin Oromoo hundi jenneta keessa kan jiraatu fakkeessanii lolan baayyetu dhaga'ame. Kanneen achi debi'anii, ija jabina guddaan, walgahii Oromoo irratti “Oromoon extremism saa dheese centralist ta'uu qaba; Oromoon saboota 33

marfamee waan jiruuf mirgasaa yoo gaafate diina baayyifata” fi kkf jechuun ummaticha sodaachisuun hamilee cabsuu yaalantu dhufe. Kaan saanii yeroosaan haasa’an yoo dhageessan, osoo Wayyaneen hin beektan ta’ee, kan wayyaneen nagaan rakkoo Itoophiyaa fi Oromia gidduu jiru hiikuuf harkashee qabsaa’ota Oromootti ballisaa jirttu fakkeessu. Gaarummaansaa, kan akka wayyaaneen nagaa hin feene hin beekne hin jiru – yoo faaydaa maataa isaaf jedhee achi ilaale malee!

Kan “Oromoon lafa amma irra jiru saba biraa irraa humnna fudhate; qormaataan bira geenye” jechuun saba koloneeffatame kana saba koloneeffataa fakkeessanii dhiheessuu barbaadanis dhalatanii jiru. Isaan kun warra afaaniin haasa’anii dhiisan miti, kanneen barnoota baranee qaban jedhaman, kanneen barreessanii diinota Oromoof akka ragaatti dhiisanii dabruu danda’an. Warri kun ayyaan laallattoota yeroo tokkumman qabsaa’otaa jabaa ture, kana gochuu dhiisaati hin yaadinnellee turan. Tokkummaa dhabanne. Kanaaf irree dhabinne. Ayaan-lallattoonni ammo irree malee waan itti amanan hin qaban. Hara’a osoo irree qabaannee jioraannee ayyaan-laallattoonni amma achi dhaabatanii dhagaa as guuran silaa as dhaabatanii achi guru turan.

Tokkummaa dhabuun, irree nu dhorkate. Irree dhabuun keenya saba keenya alagaa biratti kabaja dhabsiise, diina saba keenyaa jabeesse.

Har’a, sabbonttonni fi qabsaa’onni Oromoo, sagalee tokkoon, kun nu haa ga’u jechuu qabna! Kun amma ha dhabbatu jechuu qabna!

Akkuma WAO xalayaa saanii irratti jedhan, mooraa Qabsoo Bilisummaa Oromoo keessatti araari bu’uu qaba. Qabsa’onni Oromoo humna tokkome fi hogganaa itiiitaa jalatti sosso’uu qabu. Yaada tokkoon diina irratti xiyyeefachuu qabu. Bilisummaa sabin Oromoo hawwuun shaffisuu qabu.

Hawwii kana milkeessuuf:

Dhaabonni siyaasaa Oromoo har’a asitti argaman hundi gaaffii “Oromoon maal barbaadaa” jedhu ifatti deebi’suu qabu. Waan Oromoon barbaadu ilaalchisee firaaf alagaa afanfaajjessuun nu haa ga’u! Har’a kaasee haa dhaabbatu! Gara keenyaan gaaffii kanaaf deebiin keenya, Oromoon saba koloneeffatame, saba walabummaa biyyasaa fi bilisummaa sabasaa humnna sarbame waan ta’eef kan barbaadu walabummaa biyyasaa fi bilisummaa sabasaati. Deebii kana, afaan tokkoon, saalfii malee, firaaf alagaaf kennuu ni dandeenyaa? Yoo deebiin ‘eeyyee’ ta’e waan tokkummaa keenya deebfinnee hin jabeffanneef gonkumaa hin jiraatu.

Kanneen maqaa ABOn sosso’an hundi “Akeekin QBO ABOn geggeeffamuu maali inni?” gaaffiin jedhus ifatti deebi’suu qabu. Gara keenyaan, ABOn hireen murteeffannoo mirga saba Oromoo ta’u ni beeka, ni fudhata. Hireen murteeffannoo meesha ittiin bakka tokko gahan malee bakka gahan sana miti. Kanaaf, dhaabin keenya ABOn “hiree murteeffannoo” jala hin dhokatu. Dhaabin keenya kan qabsaa’u biyya Oromoo walaba fi saba Oromoo bilisa argamsiisuuf. Murtii sabin Oromoo dhibbaa tokko malee murteeffatu ammo ni kabaja, Yeroo Oromoon hiresaa murteeffachuu ga’ettillee ABOn kan saba Oromoo gorsu Oromia walaba ofiin bulu akka filatan ta’a. Ammallee, firattis ta’e alagaatti kana saalfii tokko malee hima. Kaayyoo kana irrattis saba ijaara. Kana irratti walii gallaa? Afaan qofaan osoo hin taane hojiinis mul’isuuf waadaa walii-gallaa? Yoo deebiin ‘eeyyee’ ta’e waan tokkummaa keenya deebfinnee hin jabeffanneef gonkumaa hin jiraatu.

Kanneen “kaayyoon keenyas kanuma, garuu yoo akkas jennee ifatti dubbanne addunyaan nu hin dhagahu, nu hingargaaruus” jedhan yoo jiraatan, gaaffii isaaniif qabna. Innis, “kan kanaan dura dhoksutaniif , addunyaan maal isin gargaaree? Amma hoo maal isin gargaaraa jiraa?” kan jedhu ta’a. Addunyaan nama saalfachaa mirgasaa gaafatuuf akka garaa laafina hin qabne ammayyuu hin hubannee ittiin jetna. Tooftaa dha; Addunyaa itti gowwomsina jedhanii tooftaa firaa fi alagaa afanfaajjessu qiyaasuun dhaabbachuu qaba! Alagaa ittiin gowwomsina jedhanii tooftaa Oromoo diina fi fira isaa walii-wallaalchusittii dhimma bahuun hafuu qaba! Kun yaalamee itti bahiinsa isaa arginee jirra. Itti bahiinsi isaa, saba keenya afanfaajjesse, Tokkummaa keenya diige, Irree keenya laaffise. Qabsoo keenya dadhabsiise, Addunyaa garuu nuuf hin dirmachiifne. Wayyaanees hin qophxeessine. Qabsoo keenya boodatti deebise malee! Mootummootin dhihaa, yoo waan isaan dhagahuu fedhan itti himne, waa nuu godhu jedhanii kan abjootan yoo jiraatan hirriba saanii irraa dammaquu qabu. Addunyaan nama kadhatuuf hin keenu; kan ija jabaatee falmatuuf malee!

Impaayera kana dimookraatessinee achi keessan mirga Oromoo argamsiisna warri jedhanii yaadanis yoo jiraatan abjuusaanii kana irraa amma dammaquu qabu. Seenaa Impaayerichaa irraa baratu qabu! Filannoo warra habashaa torbban dabree, kan Wayyaaneen barchuma caffee saanii 547 keessaa 499n mo’ee jettee himattu irraa baratu qabu! Barcuma Oromiaf kenname jettu 178 hunda humnaan fudhachuusee irraa baratu qabu! Obboleeyyan keenya akeeka Itoophiyaa dimookraatessuuf biyya keessa bara dheeraaf sosso’aa jiran Oromoof maal buusan jedhaanii of gaafachuu qabu! Mootummaa wayyanee dimookraata’aa fakkeessuu irraa kan hafe bu’aa qabatamaa isaan Oromoof buusan jiraa? Jedhanii of gaafachuu qabu! Deggersi isaan saba Oromoo biraa qaban hoo, maal fakkaataa? Jedhaanii of gaafachuu qabu! Deebiin gaaffilee kanaa abjuu Itoophiyaa dimookraatessuu irraa isaan akka dammaqsu shakkii hin qabnu.

Yaada kana sabboontota Oromoo gidduu facaasuun, yaada qabsaa’otaa faffacaasee. Tokkummaa keenya diige. Malee qabsoo keenya hin gargaarre. Nu hin jabeessine. Kana irraas barachuu qabu.

Yoo kana fi qabxiileen armaa olitti xuxxuqe irratti waliigalle, afaan qofaan osoo hin taane hojjiinis mul’isuuf waadaa walii-galle, waan gargar nu baasu gonkumaa hin jiraatu.

Tokkummaa qabsaa’otaa amma laafee deebifne jabeessuu ni dandeenya! Irree cimaa kan saba keenyaa alagaa biratti kabajachiisu horachuu ni dandeenya! Diina irratti waliin xiyyeeffachuu ni dandeenya! Walabummaa biyya keenyaa fi bilisummaa saba keenyaa shaffisuu ni dandeenya!

Gara keenyaan ilaalchi nuti hunde jeequmsa mooraa QBO fi furmaata isaa irratti qabnu jalqabaa hamma ammaatti hin jijjiiramne. Hundeen isaa addaddummaa ilaalcha siyaasa ti furmaatin isaa ammo taa’anii haasa’uu fi kaayyo QBO tti deebi’uu dha.

Haala Haasaa Nagaa

Dhimma kana irratti yeroo dhihoo as mallattoolee hamlchiisoo tokko tokko argaa dhufuu keeya har’a gammachuu goddaanin isinitti hima. Murnoonni maqaa ABOon sosso’an hundi taa’anii haasa’anii rakkoo dhalatee furachuu malee filmaatin biraa akka hin jirre fudhatanii jiru. Fudhachuu qofaa osoo hin taa’anii mare jalqabanii jiru. Mareen kun, yeroo ammaatti sadarkaa addaddaa irratti argama.

Gara keenyan, mare kana irraa bu'aan barbaadinnu, fuula-duratti akka iraa of eeggachuu dandeenyuuf badii dabre irraa barachuu, hiikkaa kaayyoo ABO irratti yaada keenya wal-qixxeeffachuun araara buufnee, tokkummaa qabsaa'ota deebisnee ijaaruun, dhaaba keenya deebifnee dhinsuu, jabeessuu fi humneessuun diina irratti xiyyeeffanee bilisummaa sabin keenya hawwu shaffisuu dha.

Bakki amma irra jirru, murnna tokkoo wajjin hiikkaa kaayyoo ABO irratti yaada keenya wal-qixxeeffannee, waan debre irraas waan barannu irratti waliigallee jira. Fuula durattis waan sirreeffachuu qabnnu irratti waliigallee jirra. Kan nu hafu sagantaa hojii waliin baafachuu fi isa hojiitti hiikuu dha. Isaaf yeroo dhihootti xumuranna jennee abdanna.

Qaama lammataa wajjin ammo waan addaddaa (fkf: waan dabre irraa waan barannu) irratti yaada walqixxeeffachuu irratti gufuun nu qunnamee isa bira dabruuf hojjechaa jirra.

Nuti gara keenyaan, qabsaaota Oromoo kaayoo qabsichaa irratti ilaalchi keenya wal fakkaatu hunda wajjin caalaatti walitti-siqeenyaan hojjechuuf, dhaaba tokko fi hooggana tokko jalatti wal-gurmeessinee QBO shaffisuuf, tattaaffii goonu itti fufna. Isinillee

Dhuma irratti dhamsi gara keenyaan hundumaaf qabnnu, addaddummaan ilaalcha siyaasaa yoo jiraatellee hundee keenya raasuu akka hin qabne yeroo hunda akka yaadatamu. Hundeen keenya Oromummaa dha. Oromummaan hundee waan goonu hundaati. Yoo Oromummaan hin jirre kaayyoon hin jiru. Yoo Oromummaan hin jirre Oromian hin jirttu. Kanaaf, yeroo ilaalcha siyaasa irratti wal dhabnnu, Oromummaa ha qusannu. Tumsa ahorachuuf jecha kutaa fi gandaan wal ijaaruun farra oromummaa ti. Ilaalcha irratti wal dhaban ittiin uukksuu fi dhoksuuf gandummaa fi naannummaa namatti maxxansuunis farra Oromummaa it.

Tokkummaan humna!

Oromiyaan ni bilisoomtti!

Waan na dhaggeeffataniif galatoomaa!